

HOUTMAN, H., De griep. (Ienakter). (1989).

0.71

Speulers; Atsje, moeder, is nogal een bezorgd type (A)
Stien, heur dochter, (S)
Hein, de buurman, nogal ni'jsgierig (H)
Kees, vader van Stien en Geert (K)
Geert, de zeune, ni'je wereldkampioen? (G) kotte rol
Beppe, (B) hiele kotte rol.

teniel; een huuskamer

Begin: Atsje & Stien zitten an de taafel. Ze hangen boven een koeme damp, hebben beide een haanddoek over 't heufd. Ze zeggen eerst niks, beginnen dan om de beurt te hoesten, dan toegeliekes, daornao proesten, alles deur mekere, de hieltied hadder.

A; (komt onder de doek weg) Ik hool et niet meer uut. Die dampo slat mi'j op 'e longen. 't Is wat zoe'n griep.

S; Jow moe'n volholen moeke, dan bi'j d'r eerder of!

A; Dat zal wel. Et moet zien tied hebben. Alle kwaolie stoffen zullen d'r eerst wel uut moeten.

S; Heb ie die dan moeke! ?

A; Stomen jow now mar deur Stien, dan kuj' overmorgen weer naor schoole.

S; (komt ok onder de doek weg) Naor schoole? Die is al een weke dichte. Driekwat van de kiender het de griep. De meester en de juffer ok.

A; Och heden, dan he'k je nog wel een weke an de rokken hangen!

S; Niet iene ontkomt d'r an moeke.

A; Inderdaod, aj' nog niet snotterig binnen, dan woj' et wel.

S; Waarmte is et beste medisien, zeggen ze altied. Daor moej' goed omme-daenken moeke.

A; Docht ie dat ik dat niet wus. Kiek mar es. (Haelt een waeterzak onder de jurk weg) As dit nog niet helpt, dan weet ik et niet meer.

S; Mar jow lopen ok wel es zonder jasse naor buten.

A; Da's misschien twie keer gebeurt van 't winter, nee daor he'k et niet van te pakken kregen. Weej' wie dat nog wel es doet, Beppe. Die gooide least bi'j 10 graoden onder nul de bostrok uut!

S; Dan zal die de griep now ok wel hebben.

A; Zokke oolde meemskan hebben vaeks weinig weerstand. Die zal now wel onder een deken of zeuven te klumem liggen, daenk. 'Is trouwens muulik nao te gaon. Ik hebbe heur al een peer keer beld, mar ze nemt mar niet op.